

COMUN DI REMANZÂS
PROVINCIE DI UDIN

STATÛT COMUNÂL

TABELE

TITUL PRIN - DISPOSIZIONS GJENERÂLS

CJAPITUL I - CARATERISTICHS DAL COMUN

ART. 1 - PRINCIPIIS FONDAMENTÂI	PAGJ. 4
ART. 2 - TERITORI E SEDE COMUNÂL	PAGJ. 4
ART. 3 - POPOLAZION	PAGJ. 4
ART. 4 - TUTELE DAL PATRIMONI COMUNÂL	PAGJ. 5
ART. 5 - ADESION AI PRINCIPIIS DE CJARTE EUROPEANE E DE PÂS	PAGJ. 5
ART. 6 - STEME E CONFENON	PAGJ. 5
ART. 7 - CONSEI COMUNÂL DAI FANTATS	PAGJ. 5
ART. 8 - CUADRI PRETORI	PAGJ. 6

CJAPITUL II - PRINCIPIIS GJENERÂI

ART. 9 - COMPETENCIS DAL COMUN	PAGJ. 6
ART.10 - FINALITÂTS	PAGJ. 6
ART.11 - FUNZIONI DAL COMUN	PAGJ. 7
ART.12 - PROGRAMAZION	PAGJ. 7
ART.13 - SERVIZIS PUBLICS	PAGJ. 8

TITUL SECONT - ORGHINS DAL COMUN

ART.14 - ORGHINS DAL COMUN	PAGJ. 8
ART.15 - LINIIS PROGRAMATICHS DI MANDÂT	PAGJ. 8

CJAPITUL I - CONSEI COMUNÂL

ART.16 - COSTITUZION	PAGJ. 9
ART.17 - STATUS, DIRITS E DOVÊS DAL CONSEÎR COMUNÂL	PAGJ. 9
ART.18 - GRUPS CONSILIÂRS	PAGJ. 10
ART.19 - COMISSIONS CONSILIÂRS	PAGJ. 10
ART.20 - CONSEI COMUNÂL	PAGJ. 10
ART.21 - COMPETENCIS E ATRIBUZIONI DAL CONSEI	PAGJ. 11
ART.22 - CLAMADE DAL CONSEI	PAGJ. 11
ART.23 - SIOLZIMENT DAL CONSEI	PAGJ. 11
ART.24 - PUBLICITÂT DES SENTADIS	PAGJ. 12
ART.25 - LIS VOTAZIONS	PAGJ. 12

CJAPITUL II - LA ZONTE COMUNÂL

ART.26 - LA ZONTE	PAGJ. 12
ART.27 - COMPOSIZION	PAGJ. 12
ART.28 - NOMINE DE ZONTE COMUNÂL	PAGJ. 13
ART.29 - INCOMPATIBILITÂTS E IMPROIBIZIONS	PAGJ. 13
ART.30 - CLAMADE E FUNZIONAMENT DE ZONTE	PAGJ. 13
ART.31 - REVOCHE DAI ASSESSÔRS	PAGJ. 13
ART.32 - COMPETENCIS DE ZONTE COMUNÂL	PAGJ. 13

CJAPITUL III - IL SINDIC

ART.33 - SINDIC	PAGJ. 14
ART.34 - ELEZION DAL SINDIC	PAGJ. 15
ART.35 - ATRIBUZIONI DI AMINISTRAZION	PAGJ. 15

ART.36 - ATRIBUZIONI DI VIGILANCE	PAGJ. 16
ART.37 - ATRIBUZIONI DI ORGANIZZAZIONE	PAGJ. 16
ART.38 - VICESINDIC	PAGJ. 16
ART.39 - MOZIONI DI SFIDUCIA	PAGJ. 17
TITOL III - ORGANIZZAZIONE DEI UFFICI E DEL PERSONALE	
CAPITOL I - SEGRETARI COMUNALE	
ART.40 - SEGRETARI COMUNALE	PAGJ. 17
ART.41 - DIRETTORE GENERALE	PAGJ. 17
CAPITOL II - PERSONALE	
ART.42 - PRINCIPI E CRITERI	PAGJ. 17
CAPITOL III - ATTIVITÀ AMMINISTRATIVE	
ART.43 - PRINCIPI E CRITERI	PAGJ. 18
ART.44 - CONFERENZE DEI SERVIZI	PAGJ. 18
TITOL IV - ORGANIZZAZIONE TERRITORIALE E FORME ASSOCIATIVE	
CAPITOL I - ORGANIZZAZIONE TERRITORIALE	
ART.45 - ORGANIZZAZIONE SORE COMUNALE	PAGJ. 19
ART.46 - PRINCIPI DI COOPERAZIONE	PAGJ. 19
ART.47 - CONVENZIONI	PAGJ. 19
ART.48 - CONSORZI	PAGJ. 19
ART.49 - ACQUADRI DI PROGRAMMA	PAGJ. 20
TITOL V - ORDINAMENTO DEI SERVIZI PUBBLICI	
CAPITOL I - ORDINAMENTO DEI SERVIZI PUBBLICI	
ART.50 - SERVIZI PUBBLICI LOCALI	PAGJ. 20
ART.51 - AZIENDE SPECIALI E ISTITUZIONI	PAGJ. 21
TITOL VI - PARTECIPAZIONE POPOLARE	
CAPITOL I - PARTECIPAZIONE POPOLARE	
ART.52 - PRINCIPI GENERALI	PAGJ. 21
CAPITOL II - INIZIATIVE POLITICHE E AMMINISTRATIVE	
ART.53 - ISTANCI	PAGJ. 22
ART.54 - PETIZIONI	PAGJ. 22
ART.55 - PROPOSTE	PAGJ. 22
CAPITOL III - ASSOCIAZIONISMO E PARTECIPAZIONE	
ART.56 - PRINCIPI GENERALI	PAGJ. 23
ART.57 - FORME ASSOCIATIVE	PAGJ. 23
ART.58 - ORGANISMI DI PARTECIPAZIONE	PAGJ. 24
ART.59 - INCENTIVAZIONE	PAGJ. 24
ART.60 - COMMISSIONI COMUNALI	PAGJ. 24
ART.61 - DIRITTO DI ACCESSO	PAGJ. 24
ART.62 - PARTECIPAZIONE AL PROCEDIMENTO AMMINISTRATIVO	PAGJ. 25
ART.63 - REFERENDUMS	PAGJ. 25
ART.64 - DIRITTO ALLA RISERVATEZZA	PAGJ. 25
CAPITOL IV - DIFENSORE CIVILE	
ART.65 - ISTITUZIONE E ATRIBUZIONI	PAGJ. 26
ART.66 - NOMINE	PAGJ. 26
TITOL VII - ORDINAMENTO FINANZIARIO	

CJAPITUL I - FINANCE E CONTABILITÂT	
ART.67 - FINANCE LOCÂL	PAGJ. 26
ART.68 - ORDENAMENT CONTABIL	PAGJ. 27
TITUL VIII - I REGOLAMENTS	
CJAPITUL I - REGOLAMENTS	
ART.69 - PROCEDIMENTS PE FORMAZION DAI REGOLAMENTS	PAGJ. 27
TITUL IX - REVISION DAL STATÛT	
CJAPITUL I - REVISION DAL STATÛT	
ART.70 - MODALITÂTS	PAGJ. 27
TITUL X - NORMIS TRANSITORIIS E FINÂLS	
CJAPITUL I - NORMIS TRANSITORIIS E FINÂLS	
ART.71 - REGOLAMENTS	PAGJ. 28
ART.72 - JENTRADE IN VORE	PAGJ. 28

**TITUL PRIN
DISPOSIZIONS GJENERÂLS**

**CJAPITUL PRIN
CARATERISTICHS DAL COMUN**

*ART. 1
PRINCIPIS FONDAMENTÂI*

- 1) Il Comun di Remanzâs al è Ent teritoriâl di base, cun autonomie statutarie, regolamentâr, organizative e, tai limits des leçs di coordinament de finance publiche, finanziarie.
- 2) Il Comun di Remanzâs al è espression e al rapresente la sô Comunitât, al cure i siei interès e al promôf il so disvilup; cun di plui al tutele la sô identitât e la sô culture, al favorîs i rapuarts e lis colaborazions cun chês altris Comunitâts, Ents Locâi, e realtâts istituzionâls.
- 3) Rispietant i principis costituzionai e des leçs il Comun, cui istitûts di chest Statût, al fâs che si rivi al ben comun, ispirantsi al rispiet de vite, de persone, dal ambient e di ogni ideâl di convivença pacifiche.
- 4) Il Comun di Remanzâs al è ad in plen part de Union europeane e de Comunitât mondiâl e al partecipe ae promoziun de culture de pâs, de solidarietât e de cooperazion internazionâl al disvilup.

*ART. 2
TERITORI E SEDE COMUNÂL*

- 1) Il Comun di Remanzâs, non che al comparîs pe prime volte te bole di Celestin III dal 1192, logât tra lis citâts di Udin e di Cividât, al è costituît dai teritoris di Cerneglons, Orçan, Remanzâs, Selvis, e Zirâ.
- 2) Il teritori comunâl al à confins cun Udin, Paulêt, Faedis, Torean, Muimans, Premariâs e Pradaman.
- 3) Il palaç civic, sede comunâl, al è a Remanzâs, che al è il Cjâf lûc dal Comun.
- 4) Lis adunancis dai orghins eletîfs si fasin te sede comunâl; par dibisugnis particolârs e motivadis si pues fâlis ancje in altrò.

*ART. 3
POPOLAZION*

- 1) Il Comun di Remanzâs, tal ordenament istituzionâl, al ispiri la sô azion ae tutele dai siei citadins metintju a part dai lôr dirits e dovês, al di là di ogni difference di origjin, ses, etât, cundizion economiche, nazionalitât, raze, lenghe e religjon.
- 2) Ducj i citadins residents e/o che a lavorin tal teritori comunâl a judin a meti in vore cundizions di convivença, di solidarietât, di avualiance, di libertât - acetant i principis di pluralitât, diversitât, e libertât di cussience - garantint la esistence di oportunitât compagnis par ducj di gjoldi e di doprâ i bens e i servizis dâts de Comunitât.

*ART. 4
TUTELE DAL PATRIMONI CULTURÂL.*

1) Il Comun di Remanzâs al promôf il progrès e il disvilup de Comunitât difindint e valorizant tal stes timp il patrimoni storic, culturâl, linguistic e ambientâl locâl. Par un tant al promôf ogni buine soluzion di colaborazion cun altris sogjets publics e privâts.

ART.5

ADESION AI PRINCIPIIS DE CJARTE EUROPEANE DE PÂS.

1) Il Comun di Remanzâs, tal limit dai podês conferîts de leç, ancje in colaborazion tra Ents teritoriâi e tal spirt de Cjarte europeane des autonomiis locâls, al partecipe al disvilup de culture europeane condividint i principis di colaborazion tra i popui.

2) Il Comun di Remanzâs al cîr, cun cooperazions internazionâls, zimulaments e altris formis di relazions permanentis cun citâts di dut il mont, leams di colaborazion, fraternitât, solidarietât e amistât.

3) Il Comun di Remanzâs, in conformitât cul detât costituzionâl che al refude la vuere tant che mieç di risolucion des cuistions internazionâls, al favorîs la difusion di une culture di pâs e la tutele dai dirits umans.

ART.6

STEME E CONFENON

1) Il Comun di Remanzâs tai ats e tai sigjîi si identifice cul non di Remanzacco, cu la steme e cul confenon concedûts cun decret dal President de Republiche 16 di Novembar dal 1962.

2) Tes cerimoniis e ta chês altris ricorencis publichis si pues mostrâ il confenon comunâl te forme autorizade.

3) L'ûs e la riproduzion di chescj simbui, par fins no istituzionâi, a son improibîts. In ogni câs la Zonte comunâl e pues autorizâ l'ûs e la riproduzion de steme dal Comun par fins no istituzionâi, dome li che al sedi un public interès.

ART. 7

CONSEI COMUNÂL DAI FANTATS

1) Il Comun, par tutelâ i dirits de infanzie e favorî la partecipazion dai fantats ae vite coletive, al pues promovi la elezion dal Consei comunâl dai fantats.

2) Il Consei comunâl dai fantats al à il compit di deliberâ in vie consultive in chestis materiis: politiche ambientâl, sport, timp libar, zûcs, rapuarts cul associazionisim, culture e spetacul, istruzion publiche, ativitât pai zovins e pai anzians, promozion e difusion de cognossince dai dirits de infanzie, rapuarts cu la Unicef;

3) Lis modalitâts di elezion, il funzionament e i rapuarts cu la Aministrazion a son fissadis cun regolament specific.

ART. 8

CUADRI PRETORI

- 1) Al è individuât tal palaç civic un spazi specific di destinâ a quadri pretori pe publicazion dai ats e avîs previodûts des leçs, dal Statût e dai regolaments.
- 2) La publicazion e à di garantî la acessibilitât, la integralitât e la facilitât di leture.
- 3) Par categoriis particolârs di ats, segnâts dai orghins eletîfs, a puedin jessi individuadis altris listis tai centris abitâts.

CJAPITUL SECONT PRINCIPIS GJENERÂI

ART. 9 COMPETENCIS DAL COMUN.

- 1) Chest Statût, tal regolâ la organizazion proprie dal Comun di Remanzâs e chê dai Ents di emanazion comunâl, al specifiche lis atribuzions dai Orghins, l'ordenament dai uficis e dai servizis publics, lis formis di colaborazion cun chei altris Ents locâi, de partecipazion populâr, dal decentrament, l'acès dai citadins aes informazions e ai procediments aministratîfs.
- 2) Il Comun di Remanzâs, risprietant lis leçs e di chest Statût, al cjape i regolaments bogns de sô organizazion e al so funzionament tecnic aministratîf.

ART. 10 FINALITÂTS

- 1) Il Comun di Remanzâs al ispiri la sô azion a chescj principis:
 - a) la azion dal Comun, par garantî cundizions di avualiance efetive tra i siei citadins, e je soledut atente ae tutele e al sostegn des fassis plui debulis de popolazion;
 - b) al fâs efetîf il dirit ae educazion e al studi e al labore cu lis struturis scolastichis par valorizâ lis risorsis culturâls, ambientâls e strumentâls ufiertis dal teritori;
 - c) al jude a garantî il dirit ae salût, la salubritât e la sigurece dal ambient;
 - d) al labore pe prevenzion e pe risoluzion des situazions di malstâ e di maljessi sociâi coletîfs e individuâi. Al poie ancje lis associazions di volontariât, colaborant cun lôr. Al cjape la tutele dai dirits dai minôrs, dai anzians, dai disabii e dai emargjinâts tant che obietîf cualificant de sô azion aministrative;
 - e) al cjape lis misuris che a coventin par mantignî e par difindi l'ambient;
 - f) al ricognòs, al tutele e al sosten il rûl de famee, cemût che e je concepide par tradizion te nestre culture e vivude tal teritori;
 - g) al labore par tutelâ e par favorî il lavôr in dutis lis sôs formis individuâls e associadis. Al disvilupe i rapuarts cui imprenditôrs, lis associazions di categorie e i sindacâts dai lavoradôrs. Al ricognòs il valôr de ativitât economiche, cul disvilup sostignibil e al rimarche che di chê e à di vignî la difusion dal ben jessi pe comunitât;
 - h) al indrece il so impegn pe cressite des gjenerazions zovinis, lavorant par vinci l'isolament, lis solitudins, lis emarginazions, lis dependencis, ancje previodint la formazion permanente;
 - i) si impegne par che il ricognossiment dal dirit ae stesse dignitât e a chês stessis oportunitâts si slargji te cussience colective.
 - j) al promôf la difusion e la cognossince de storie, des culturis, des tradizions dal Friûl; al garantis la valorizazion de lenghe, de culture e de leterature furlane e, tes formis previodudis e permetudis de leç, al promôf il so ûs, la sô difusion e il so studi;
 - k) tes formis previodudis de leç, al tutele lis minorancis linguistichis.
- 2) Il mût di ûs de strutture, dai servizis e dai implants al ven regolât di regolaments specifics.

ART. 11

FUNZIONI DAL COMUN

1) I tocjin al Comun dutis lis funziions aministrativis che a rivuardin la popolazion e il teritori comunâl, in particolâr, dal setôr dai servizis sociâi, dal asset e de utilizazion dal teritori, dal disvilup economic, de educazion sociâl e des ativitâts ricreativis e sportivis.

2) Daûr dal principi di sussidiarietât, il Comun al pues fâ lis sôs funziions cu la ativitât dai citadins o des lôr formaziions sociâls, cun particolâr rivuart pes cooperativis sociâls, pes associazions e pes ONLUS. Ogni volte che il Comun al vueli afidâ compits siei al à di garantî buine publicitât e trasparenze. (1)

3) Il Sindic al coordene i oraris dai servizis e dai esercizi publics in conformitât cu lis pussibilitâts di ûs di chei di bande dai citadins, dai utents e dai consumadôrs.

Al fâs, plui tal specific, chestis funziions aministrativis;

- a) planificazion teritoriâl;
- b) viabilitât, trafic e traspuarts;
- c) tutele la valorizazion dai bens culturâi, archeologjics e ambientâi;
- d) difese dal teren, tutele dal ambient, racuelte e smaltiment dai refudums;
- e) servizis pal disvilup economic e pe distribuzion comerciâl;
- f) predisposizion di buinis struturis di protezion civîl;
- g) servizis tai setôrs sociâl, sanitari, scolastic, culturâl, sportîf e altris;
- h) altris servizis su la cure dai interès de Comunitât delegâts di leçs specifichis;
- i) polizie aministrative par dutis lis funziions di competence comunâl.
- l) dutis chês altris funziions conferidis metint in vore il decentrament aministratîf.-

ART. 12 PROGRAMAZION

1) Il Comun di Remanzâs al met in vore lis sôs finalitâts doprant il metodi e i struments de programazion.

2) Il Comun al partecipe ae determinazion dai obietîfs contignûts tai programs dal Stât e de Region zovantsi des formaziions sociâls, economichis, sindacâls e culturâls che a lavorin tal teritori.

3) Al ricognòs che la cundizion de partecipazion e je la informazion sui programs, su lis decisions e sui provediments comunâi e al cure, par un tant, la istituzion di mieçs e di struments bogns par che dutis lis informaziions su la ativitât dal ent a rivin ai citadins, fissant rapuarts cui orghins di comunicazion di masse.

(1) art. 2 leç 03.08.1999, n. 265

ART. 13 SERVIZIS PUBLICS

1) Il Comun, pe gjection dai servizis, che par lôr nature e dimension no puedin jessi esercitâts in mût diret, al pues disponi:

- a) la costituzion di aziendis speciâi;
- b) la partecipazion a consorzis, a societâts par azions, a societâts a responsabilitât limitade, a societâts miste o a societâts cooperativis;
- c) la stipule di une convenzion specifiche cun altris Comuns interessâts ae gjection dal servizi;
- d) la concession a tierçs;
- e) la costituzion di une istituzion specifiche pal esercizi di servizis sociâi che no àn relevance imprenditoriâl;

f) la conclusion di acuardis di program par fâ oparis publichis.

TITUL SECONT ORGHINS DAL COMUN

ART.14 ORGHINS DAL COMUN

- 1) A son orghins dal Comun:
a) il Consei comunâl;
b) la Zonte comunâl;
c) il Sindic.

ART. 15 LINIIS PROGRAMATICHS DI MANDÂT

1) Denti dal tiermin di 60 dîs, tacant de date dal so insediament, a son presentadis di bande dal Sindic, sintude la Zonte, lis liniis programatichis su lis azions e sui progjets di meti in vore vie pal mandât politic aministratîf.

2) Ogni Consei comunâl al à dirit di intervignê te definizion des liniis programatichis, proponint lis integrazions, i justaments e lis modificazions, cun presentazion di emendaments specifics, tes modalitâts segnadis dal regolament dal art. 20.

3) An par an, il Consei al viôt di verificâ la metude in vore di chestis liniis, di bande dal Sindic e dai rispetîfs Assessôrs. E je facultât dal Consei integrâ, vie pe durade dal mandât, lis liniis programatichis, su la fonde des dibisugnis e des problematichis che a vessin di vignê fûr.

4) Insom dal mandât il Sindic al presente il document sul stât di metude in vore e de realizazion des liniis programatichis pe aprovazion dal Consei. (1)

(1) art. 11 come 10 de leç 03.08.1999, n. 265

CJAPITUL PRIN CONSEI COMUNÂL

ART. 16 COSTITUZION

1) La elezion dal Consei Comunâl, la durade in carche, il numar dai conseîrs e la lôr posizion juridiche a son regolâts de leç.

2) I conseîrs a jentrin in carche tal at de proclamazion, o ben, in câs di surogazion, a pene cjapade dal Consei chê deliberazion.

3) Il Consei al dure in carche fintremai cje al ven elet chel gnûf, limitantsi, dopo de publicazion dal decret di convocazion dai comizis elettorâi, a cjapâ i ats urgjents e che no si pues prorogâ.

4) La prime clamade dal Consei Comunâl e je disponude dentri di 10 dîs de proclamazion dai elets dal Sindic, che i è da cjâf. Il Consei neoelet al procêt, tant che prin at, al esam de sussistence des cundizions di eleibilitât e duncje ae validazion dai elets.

5) Lis dimissions di Conseîr comunâl a son presentadis al Consei par scrit, no si pues revocâlis, nol covente che si cjapi at di lôr e a son buinis daurman. La surogazion dai Conseîrs dimissionaris e à di jessi metude in vore dal Consei dentri di 10 dîs de presentazion des dimissions. (1)

ART.17 STATUS, DIRITS E DOVÊS DAL CONSEÎR COMUNÂL.

1) La cundizion juridiche e il status dai Conseîrs comunâi a son regolâts de leç; lôr a rapresentin dute la Comunitât e no àn vincûl di mandât.

2) Il Conseîr comunâl al à i dirits e i dovês segnâts ca sot, che lis lôr modalitâts e formis di esercizi a son regoladis dal regolament:

- a) al à il dirit di iniziative e di control par ducj i ats di competence dal Consei, al pues fâ domandis, proponi mozioni, ordins dal di, interrogazions e interpelancis e domandâ informazions al Sindic e ai Assessôrs;
- b) al à il dirit di otignî dai uficis dal Comun e des aziendis e ents che a dipindin di chest, dutis lis notiziis e lis informazions buinis par puartâ indevant il mandât e di vê copie dai ats;
- c) al à di tignî la riservatece e il segret di ufici tai câs regolâts de leç, al à di astignîsi de discussion e de votazion di deliberazions tai câs previodûts de leç, al è responsabil di persone dal vôt che al vedi pandût, nol pues tignî incarghis e cjapâ consulencis li di ents e istituzions che a dipindin o che in dut câs a son sometudis al control e ae vigilance dal Comun;
- d) al esercite il dirit di sindacât ispetîf;
- e) al pues someti lis deliberazions di Zonte e consiliârs al control preventîf di legjitimitât, tai câs e cu lis modalitâts previodudis des leç in vore (2)

3) Ogni Conseîr comunâl no resident al à di elei un so domicili tal Comun di Remanzâs par fâi rivâ lis clamadis e lis comunicazions. Se no lu fâs, si cjape par domicili la Segretarie comunâl.

4) I Conseîrs a àn il dovê di intervignî aes riunions dal Consei comunâl e des Comissions che a 'ndi fasin part.

(1) art. 5 come 1 leç 15.05.1997, n. 127

(2) art. 17 come 38 de leç 15.05.1997, n. 127

5) I Conseîrs comunâi che, cence motîf justificât, no vegnin a trê sentadis seguitivis a cessin dal Consei comunâl o de Comission.

6) La decjadence e je pronunciade dal Consei comunâl, dopo de notificazion de proposte di decjadence al Conseîr interessât, che al pues fâ valê lis causis justificativis dentri di 10 dîs, e su chês al à di pronunciâsi il Consei. (1)

ART.18 GRUPS CONSILIÂRS

1) I Conseîrs comunâi a àn la facultât di costituîsi in grups componûts di un o di plui components; par un tant dentri di vot dîs de sentade di insediament e de validazion dal Consei comunâl o ben dentri di vot dîs de surogazion i Conseîrs a àn di declarâ par scrit ae segretarie comunâl a ce grup consiliâr che a vuelin apartignî. Ogni variazion seguitive e à di jessi comunicade par scrit dai interessâts ae Segretarie comunâl.

2) I Conseîrs che no vedin fat dentri dai tiermins la declarazion dal come parsore a formin un unic grup mist.

3) Ogni grup consiliâr costituît cemût che si à dite parsore, al segnale al Segretari comunâl par scrit, dentri dai vot dîs dopo dal tiermin dal come 1, o des dimissions formalizadis dal cjâf grup di prime, il non dal Conseîr cjâf grup.

4) E je costituide la conference dai cjâfs grup consiliârs, che il so funzionament al ven definît dal regolament dal art. 20 di chest Statût.

ART. 19 COMISSIONS CONSILIÂRS

1) Il Consei Comunâl al pues zovâsi di comissions constituidis cun criteri proporzionâl, garantint lis rapresentancis di ducj i grups consiliârs costituîts, daûr des modalitâts previodudis dal regolament dal articulo 20, che a 'ndi regole cun di plui il funzionament e lis formis di publicitât dai lavôrs. Il Consei comunâl, cun maiorance assolude dai siei membrs, al pues istituî dentri di se comissions di indagjin su la ativitât aministrative, cun funzions consultivis e propositivis. La presidence des comissions consiliârs che a àn funzion di garanzie o di control e ven dade ai conseîrs che a fasin part dai grups di minorance. (2)

2) Il regolament al previôt ancje lis formis pe partecipazion popolâr ae ativitât des Comissions consiliârs, o ben al pues previodi che a chês o aes pussibilis sotcomissions che si formassin, a puedin partecipâ personis diviersis dai conseîrs comunâi, in vieste di auditôr o di consulent.

ART. 20 CONSEI COMUNÂL

1) Il Consei comunâl, rapresentant dute la comunitât, al determine l'indreçament politic e al esercite il control politic istituzionâl dal ent.

(1) art. 11 come 4 de leç 03.08.1999, n. 265

(2) art. 1 come 1 de leç 03.08.1999, n. 265

2) Il Sindic al è membri di dirit dal Consei comunâl. I sta da cjâf, in câs di sô assence o impediment al cjepe il so puest il Vicesindic o i Assessôrs comunâi in ordin di anzianitât anagrafiche. Tal câs il Vicesindic e/o i Assessôrs a sedin di fûr dal Consei, chest al à da cjâf il Conseîr che al à vût il plui grant numar di vôts.

3) Il Consei, costituît in conformitât cu la leç, al à autonomie organizative e funzionâl. Par un tant al fâs bon il regolament pal so funzionament, cun maiorance assolude dai conseîrs assegnâts al Comun.

ART. 21 COMPETENCIS E ATRIBUZIONI DAL CONSEI

1) Il Consei comunâl al esercite la potestât e lis competencis previodudis des disposizions dal art. 32 de leç n.142/1990 e di altris normis di leç e al davuelç lis sôs atribuzioni conformantsi ai principis, ai criteris, aes modalitâts e ai procediments previodûts des leçs, dal Statût e des normis regolamentârs.

2) Lis deliberazions di competence dal consei no puedin jessi cjapadis in urgjence di altris orghins dal Comun, gjavant chês su lis variazioms di balanç di sometî a ratifiche dal Consei tai 60 dîs dopo, sot pene di decjadence.

ART. 22 CLAMADE DAL CONSEI

1) Il Consei comunâl al à di dâsi adun in sentade ordenarie almancul dôs voltis al an: une par deliberâ il balanç di prevision, chê altre par deliberâ il cont consuntîf.

2) Il Consei comunâl al è clamât dal Sindic o di cui che al cjape legalmentri il so puest dopo de fissazion dal ordin dal dì che al ven recapitat ai conseîrs comunâi e ai citadins che a interoghin, pe part che ju tocje, al Coleç dai revisôrs, al Difensôr civic almancul 6 dîs prime dal so davuelziment, par ce che al tocje lis sentadis ordenariis e almancul 5 dîs prime dal so davuelziment pes sentadis no ordenariis.

3) In câs di urgjence la clamade si pues fâ cuntun preavîs di almancul 24 oris.

4) Il Sindic al à di meti adun il Consei intun tiermin no parsore di vincj dîs dal riceviment de domande sotscriete di bande di almancul 1/5 dai conseîrs, metint dentri tal ordin dal dì lis cuistions domandadis. La domande su propuestis di deliberazions e ven metude dentri tal ordin dal dì tal limit des competencis dal Consei.

5) In circostancis particolârs e ecezionâls, citadins, singui e associâts, a puedin domandâ al Sindic la clamade dal Consei comunâl proponint ordins dal dì specifics. Ae domande di clamade, il Sindic al pues sodisfâ la domande se al cjate la oportunitât. In câs contrari e je garantide une rispueste suficiente a chei che a àn fate domande.

ART. 23 SIOLZIMENT DAL CONSEI

1) Il Consei Comunâl al pues jessi siolzût:

a) cuant che al fasi ats contraris ae Costituzion o par violazions di leç seriis e persistentis, e ancje par seris motîfs di ordin public.
b) cuant che nol puedi jessi garantît il funzionament normâl dai orghins e dai servizis par chestis causis:

- 1) par dimissions, impediment permanent, rimozion, decjadence o muart dal Sindic;
- 2) daûr des dimissions contestuâls o in chel timp istès presentadis al protocol dal Comun de metât plui un dai Conseîrs assegnâts, cence contâ par un tant il Sindic.
- 3) cuant che nol sedi fat bon tai tiermins il balanç di prevision;
- 4) cuant che e sedi stade ometude la deliberazion di disest finanziari
- 5) riduzion par impossibilitât di surogâ la metât dai components.(1)

ART. 24 PUBLICITÂT DES SENTADIS

1) Lis sentadis dal Consei comunâl a son publichis.

2) Il regolament al fisse i câs che il Consei si da adun in sentade segrete.

ART. 25 LIS VOTAZIONS

1) Lis votazions a sucedin cun vôt palês par alçade di man e lis deliberazions a vegnin cjapadis a maiorange di chei che a votin, gjavant i diviers câs previodûts de leç o dal regolament.

2) Il regolament al fisse i câs che il Consei al vote a scrutini segret.

CJAPITUL SECONT LA ZONTE COMUNÂL

ART. 26 LA ZONTE

1) La Zonte comunâl e colabore cul Sindic te aministrazion dal Comun e e lavore cun deliberazions colegjâls.

2) E ispire la sô ativitât ai principis de colegjalitât, de transparence e de eficiencie.

3) Cheste e riferîs an par an al Consei su la sô ativitât, e met in vore i siei indreçaments gjenerâi e i fâs ativitât propositive.

ART. 27 COMPOSIZION

1) La Zonte comunâl e je componude dal Sindic che le è da cjâf e di no plui di sîs Assessôrs.

(1) Il Sindic in nomine al decît il numar dai Assessôrs che a fasaran part dal orghin colegjâl, rispîtant il limit massim a pene dit. In ogni câs il Sindic al pues modificâ il numar dai Assessôrs vie pal so mandât.

2) A puedin jessi nomenâts assessôrs ancje citadins no elets conseîrs comunâi se in possès des carateristichis domandadis di compatibilitâts e di eleibilitât ae carghe di conseîr. Lis carateristichis domandadis za dits a son verificâts dal Consei cu la procedure che si ten pe validazion dai conseîrs. I assessôrs no conseîrs a partecipin aes sentadis consiliârs cence drit di vôt.

art. 47 come 2 dal TUEL

(1) art. 5 come 2 e 3 leç 15.05.1997, n. 127

(2) art. 11 come 7 de leç 03.08.1999, n. 265

ART. 28 NOMINE DE ZONTE COMUNÂL

1) Il Sindic al nomene i components de Zonte comunâl che tra chei un Vice Sindic e al da comunicazion al Consei comunâl te prime sentade dopo de elezion.

2) Il Consei comunâl, dopo de verifiche dal art. 25 come 2, di chest Statût, al cjape at de nomine de Zonte comunâl.

ART. 29 INCOMPATIBILITÂTS E IMPROIBIZIONS

1) Ai Assessôrs comunâi ur è improibît di tignî incarghis e di cjapâ consulencis li di ents e istituzions dependents o in dut câs sometudis al control e ae vigilance dal Comun.

ART. 30
CLAMADE E FUNZIONAMENT DE ZONTE

1) La zonte e je clamade dal Sindic che le è da cjâf e che i tocje la determinazion dai arguments di meti tal ordin dal dì.

2) Lis sentadis de Zonte no son publichis e lis votazions a son palesis. Aes sentadis a puedin partecipâ, cence dirit di vôt e su determinazion dal Sindic:

- responsabii di servizis
- conseîrs comunâi
- esperts e consultants esternis.

3) Pe validitât des sentadis e covente la presince di metât plui un dai components.

ART. 31
REVOCHE DAI ASSESSÔRS

1) Il Sindic, cun provediment formâl, al pues revocâ un o plui assessôrs de carghe, dant comunicazion motivade al Consei comunâl.

ART. 32
COMPETENCE DE ZONTE COMUNÂL

1) La Zonte comunâl e colabore cul Sindic tal meti in vore i indreçaments gjenerâi dal Consei comunâl.

2) E riferîs al Consei comunâl su la sô ativitât e i fâs ativitâts propositivis e di sburt.

3) In particolâr i tocjin ae Zonte comunâl:

a) atribuzions di guvier

- Cjapâ ativitât di iniziative, di sburt e di racuardi cun orghins di partecipazion;
- prontâ i regolaments previodûts des leçs e dal Statût di puartâ sot dal esam dal Consei comunâl, fâ bon il scheme di bilanç preventîf anuâl cun dongje la relazion di prevision e programatiche e scheme di bilanç preventîf plurienâl e la relazion al cont consuntîf;
- fâ bogns i progjets preliminaris e definitîfs des oparis publichis, i programs esecutîfs, i disens di metode in vore dai programs, lis liniis - obietîf dai indreçaments deliberâts dal consei;
- definî lis cundizions di aplicâ tes convenzions cun sogjets publics e privâts, che a tocjin oparis e servizis e in materie urbanistiche, gjavant lis competencis consiliârs;
- disponi la acetazion o il dinei di las e donazions, rispientant la competence consiliâr ex art. 32 let. m) de leç 142/1990;
- autorizâ il sindic a stâ in judizi, jurisdizionâl e aministratîf, tant che atôr o clamât in cause, e fâ bon lis transazions.
- fâ lis funzions delegadis dal Stât, de Region o de Provincie, cuant che no assegnadis a palês de leç e dal statût a un altri orghin;
- cjapâ in urgjence lis deliberazions su lis variaziions di bilanç, passantlis sot de ratifiche dal consei tai 60 dîs dopo sot pene di decjadence;
- destinâ il fonds di risierve;
- definî la concession di contribûts ordenaris e straordenaris colegâts al disvilup dal associazionisim comunâl, in funzion dal principi di sussidiarietât;
- definî la puartade puntuâl des spesis di rapresentance in ocasion di cerimoniis, inovâi, aniversaris e v.i., rispientant i principi previodûts dal Consei comunâl;

- definî la ativitât culturâl anuâl, cun indicazion di programs, spesis, timps e modalitâts;
- nomenâ lis comissions di gare e di concors, la comission edilizie, il nucli di valutazion e di control strategic;
- decidi pes incarghis professionâls di nature fiduciarie e par chei di impuartance plui alte, gjavant il câs deleghe pandude al responsabil dal servizi competent;
- deliberâ in materie tributarie e tariffarie, rispjetant lis competencis consiliârs;
- destinâ lis sanzions aministrativis pecuniariis daûr dal codiç de strade

b) atribuzions organizativis

- fâ bogns i regolaments sul ordenament dai uficis e dai servizis;
- fâ bon il program trienâl dal dibisugn di personâl;
- fâ bon il plan des risorsis e dai obietîfs o il plan esecutîf di gjestion;
- fâ bogns i acuardis di contratazion decentrade a nivel aziendâl.

CJAPITUL TIERÇ IL SINDIC

ART. 33 SINDIC

1) Il Sindic al è l'orghin responsabil de amministrazion dal Comun.

2) Il Sindic al rapresente il Comun, al clame e al è da cjâf dal Consei comunâl e ancje de Zonte comunâl, al soreintint al funzionament dai servizis e dai uficis e ae esecuzion dai ats.

3) Il Sindic, prime di cjapâ lis funzions su la carghe, al fâs zurament devant dal Consei te sentade di insediament daûr di cheste formule: "Giuro di osservare fedelmente la Costituzione Italiana" (3).

4) La fasce trê colôrs cu la steme de Republiche e cu la steme dal Comun, di puartâ a bandolere, e je il distintîf dal Sindic. (4)

(1) art. 5 come 4 leç 15.05.1997, n. 127

(2) art. 11 come 1 d.lgjs. n. 77/1995

(3) art. 4 come 1 leç 15.05.1997, n. 127

(4) art. 4 come 2 leç 15.05.1997, n. 127

ART. 34 ELEZION DAL SINDIC

1) Lis modalitâts pe elezion dal Sindic, i câs di incompatibilitât e di no eleibilitât al ufici e di improibizions, il "status" e lis causis di fin de carghe, a son regoladis de leç.

ART. 35 ATRIBUZIONI DI AMINISTRAZION

1) Il Sindic, tant che orghin responsabil de amministrazion locâl, al viôt di chescj compits di caratar aministratîf:

- a) al viôt che si puarti indevant des funzions statâls e regionâls assegnadis o delegadis al ent e al à la rapresentance gjenerâl dal Comun
- b) al soreintint e al coordene la ativitât politiche aministrative dal Comun;

c) al à facultât di assegnâ a Assessôrs e a Conseîrs la cure di setôrs particolârs de aministrazion comunâl, delegant lis lôr competencis e coordinant la lôr ativitât. La deleghe ai conseîrs no compuarte rilevanze esterne;

d) al pues sospindi la adozion di ats specifics che a tocjin la ativitât aministrative delegate dai singui assessôrs;

e) al da diretivis gjenerâls al Segretari comunâl pai indreçaments funzionai e di vigilance su dute la gjestion aministrative di ducj i uficis e i servizis;

f) al pues strenzi acuardis cui sogjets interessâts par determinâ il contignût discrezionâl dal provediment finâl;

g) al promôf e al cjape iniziativis par strenzi acuardis di program cun ducj i sogjets publics previodûts de leç;

h) al cjape ordenancis ordenariis, al informe mês par mês e par estrat i cjâfs grup consiliârs di dutis lis ordenancis mandadis fûr di lui o di altri vicjari che al lavori par so cont e di ogni altri previodût de leç;

i) al da fûr lis autorizacions di polizie aministrative, e ancje lis autorizacions e lis concessions ediliziis;

l) al mande fûr provediments in materie di ocupazion di urgjence, espropriacions, che la leç, in mût gjeneric, e asseigne ae competence dal comun;

m) al coordene i oraris dai esercizi comerciâi e dai servizis publics, e ancje i oraris che i uficis periferics des aministrazions publichis a son vierts al public, daûr claris dibisugnis de coletivitât;

n) al fâs rivâ al ufici dal segretari comunâl l'at di dimissions;

o) al viôt de nomine, de designazion e de revoche dai rapresentants dal Comun li di ents, aziendis e istituzions su la fonde dai indreçaments fissâts dal Consei comunâl. Dutis lis nominis e lis designacions a àn di jessi fatis dentri di cuarentecinc dîs dal insediament, o ben dentri dai tiermins di scjadince de incarghe di prime;

p) al nomene i responsabii dai uficis e dai servizis, al nomene i responsabii e i incargâts dal tratament des bancjis di dâts, daûr de leç su la riservatece (1), al asseigne e al definìs lis incarghis dirigenziâls; al asseigne e al definìs lis incarghis di colaborazion esterne daûr des modalitâts e dai criteris fissâts dal regolament di organizazion dai uficis e dai servizis;

al da la incarghe di mes comunâl a personâl dependent idoni dal Comun, pe notificazion dai ats des aministrazions publichis.

(1) leç n. 675/1996 e modificazions e integrazions seguitivis

ART. 36 ATRIBUZIONI DI VIGILANCE

1) Il Sindaco:

al oten in mût diret li di ducj i uficis e i servizis informazions e ats ancje risiervâts;

al promôf in mût diret o zovantsi dal segretari comunâl, indagjins e verifichis aministrativis su dute la ativitât dal comun;

c) al fâs i ats conservatîfs dai dirits dal comun;

al pues disponi la acuisizion di ats, documents e informazions li des aziendis speciâls, lis istituzions e lis societâts par azions, che a fasin part dal ent, passant pai rapresentants legai di chês stessis e indi informe il consei comunâl;

ART. 37 ATRIBUZIONI DI ORGANIZAZION

1) Il Sindaco:

a) al è da cjâf la Zonte e il Consei comunâl, al fisse i arguments tal ordin dal dì des sentadis e al fisse la clamade dal Consei comunâl. Cuant che la domande e je formulade di 1/5 dai Conseîrs

al proviôt in maniere analighe intun tiermin no parsore dai vincj dîs, metint dentri tal ordin dal dì lis cuistions domandadis;
b) al clame i cjâfs grup consiliârs daûr de discipline regolamentâr;
c) al esercite i podês di polizie tes adunancis consiliârs e tai organisims publics di partecipazion popolâr dal Sindic presiedudis, tai limits previodûts des leçs;
d) al propon arguments di tratâ e al dispon cun at formâl o informâl la clamade de zonte e le è da cjâf;
e) al à podê di deleghe gjenerâl o parziâl des sôs competencis e atribuzions a un o a plui assessôrs;
f) al ricêf lis interrogazions e lis mozioni di someti al consei;
g) al rispuint dentri di 30 dîs dal lôr riceviment, aes interrogazions, interpelancis e aes istancis di sindacât ispetîf presentadis dai Conseîrs comunâl e al viôt, in câs di domande, di fâlis meti dentri te prime sentade buine dal Consei comunâl.

ART. 38 VICESINDIC

1) Il Vicesindic al ven sielt tra i membris de Zonte.

2) Il Vicesindic al sostituìs il Sindic in dutis lis sôs funzions in câs di assence o di impediment temporani. Tal câs che il Vicesindic sedi esterni al Consei comunâl, nol podarà cjapâ il puest dal Sindic assent o impedît te presidence dal Consei comunâl. Si apliche l'art. 20 di chest Statût.

3) I assessôrs, in câs di assence o impediment dal Sindic e dal Vicesindic a fasin lis funzions sostitutivis dal Sindic daûr dal ordin di anzianitât fondât su la date di nassite. Tal câs che i Assessôrs a sedin esternis al Consei comunâl, chescj no podaran cjapâ il puest dal Sindic e dal Vicesindic assents o impedîts te presidence dal Consei comunâl. Si apliche l'art. 20 di chest Statût.

ART.39 MOZION DI SFIDUCIE

1) Il vôt dal Consei comunâl cuintri di une propueste dal Sindic o de Zonte comunâl, nol compuarte lis dimissions dal Sindic o de Zonte.

2) Il Sindic e la Zonte comunâl a cessin de carche in câs di aprovazion di une mozion di sfiducie votade par clamade nominâl de maiorance assolude dai components dal Consei. La mozion di sfiducie e à di jessi motivade e sotscribe di almancul doi cuints dai Conseîrs assegnâts, cence contâ il Sindic (1) e e ven metude in discussion no prime di dîs dîs e no dopo di trente dîs de sô presentazion. Se la mozion e ven fate buine si passe al siolziment dal Consei comunâl e ae nomine di un Comissari, daûr des leçs in vore.

TITUL TIERÇ ORGANIZAZION DAI UFICIS E DAL PERSONÂL

CJAPITUL PRIN SEGRETARI COMUNÂL

ART. 40

SEGRETARI COMUNÂL

1) Il stât juridic e il tratament economic dal Segretari comunâl a son fissâts de leç e dal contrat coletîf nazionâl di lavôr.

2) Il Segretari comunâl al è nomenât dal Sindic e al dipint di lui pes funzions e cheste nomine e à la durade dal mandât eletîf, gjavant il câs di revoche (2)

3) Il Segretari comunâl al fâs i compits e lis funzions che i son afidadis des normis di leç, (3) dal Statût, o dai regolaments e dal Sindic.

ART. 41 DIRETÔR GJENERÂL

1) Lis funzions di Diretôr gjenerâl a son fatis dal Segretari comunâl, dopo dal provediment sindacâl (3). Tal at di nomine il Sindic al definirà lis competencis, la durade dal provediment stes e il compens, daûr des modalitâts definidis de Zonte comunâl.

CJAPITUL SECONT PERSONÂL

ART.42 PRINCIPIS E CRITERIS

1) Par rivâ ai fins de eficiencie, de eficacitât, de economicitât e de transparence te azion aministrative, l'ordenament dai uficis e dai servizis al è regolât cun regolaments specifics.

(1) art. 11 come 15 de leç 03.08.1999, n. 265

(2) art. 17 come 70 - 71 leç 15.05.1997, n. 127

(3) art. 17 come 68 leç 15.05.1997, n. 127

2) Il regolament al regole la dotazion dal personâl, lis modalitâts di assunzion tai impleis, lis carateristichis domandadis di acès e lis modalitâts di selezion. (1)

3) Il regolament si uniforme al principi che i podês di indreçament politic aministratîf e di control ur tocjin ai orghins istituzionai intant che la gjestion aministrative, tecniche e finanziarie, di organizacion des risorsis umanis, strumentâls e di control e je assegnade ai uficis e ai lôr responsabii. (2)

4) Il regolament, in relazion al procès di decentrament istituzionâl di li che al derive il gnûf ordenament des autonomiis, al definìs la organizacion dal lavôr cjapant chescj criteris principai:

a) metodi de programazion e de ativitât par progjets;

b) funzionalitât par ce che al tocje i compits e i programs, largje flessibilitât, colegament e interconession tra uficis, imparzialitât e transparence, armonizazion dai oraris cu lis dibisugnis de utence, (3) autonomie, funzionalitât, economicitât di gjestion e daûr di principis di professionalitât e responsabilitât.

c) l'incressi des capacitâts professionâls ancje cun cors di inzornament, in relazion ae responsabilitât di risultât;

d) pussibilitât di doprâ colaboracions esternis par cuvierzi puescj di specializazion alte o di responsabil di uficis e servizis, cun contrats a timp determinât di dirit public o privât. (4)

CJAPITUL TIERÇ ATIVITÂT AMINISTRATIVE

ART. 43

PRINCIPIS E CRITERIS

1) La ativitât dai uficis e dai servizis e va daûr dal rispîet dai principis di economicitât, eficacitât e publicitât, dal principi de trasparençe, dal rispîet de riservatece di tierçs tal tratament dai dâts personai.

2) Il Comun di Remanzâs al fonde la ativitât aministrative tal rapuart coret e fis cui citadins.

ART. 44 *CONFERENCE DAI SERVIZIS*

1) Tal câs che al sedi just fâ l'esam contestuâl di plui interès publics cjapâts dentri intun procediment aministratîf di iniziative comunâl, il Sindic al convoche la conference dai servizis.

2) La conference e je convocate dal responsabil dal procediment cuant che la Aministrazion e vedi di otignî intesis, concerti, nuie cuintri o assintiments in dut câs nomenâts di altris Aministrazions publichis. In chest câs lis determinazions concuardadis te conference tra dutis lis Aministrazions intervignudis a tegin cont dai ats za dits.

- (1) art. 6 come 10 de leç 15.05.1997, n. 127
- (2) art. 6 come 9 de leç 15.05.1997, n. 127
- (3) art. 3 d. lgjs. 31.03.1998, n. 80
- (4) art. 1 come 1 dal d.lgjs. 31.03.1998, n.80

TITUL CUART **ORGANIZAZION TERITORIÂL E FORMIS ASSOCIATIVIS**

CJAPITUL PRIN **ORGANIZAZION TERITORIÂL**

ART. 45 *ORGANIZAZION SORECOMUNÂL*

1) Il Comun al promôf e al favorîs formis di colaborazion cun altris ents publics teritoriâi par coordinâ e par organizâ dutun cun chei stes i lôr servizis e di prospetâ manieris di frontâ e soluzions unitaris a compits e finalitâts complès.

2) Il Comun di Remanzâs al pues costituî, cuntun o cun plui Comuns dongje, la union dai Comuns, pal esercizi zontât di une pluralitât di funzions. La Union e je Ent locâl, che il so at constitutîf e statût a vegnin fats bogns dal Consei comunâl. (1)

ART. 46 *PRINCIPI DI COOPERAZION*

1) La ativitât dal ent, par rivâ a un o a plui obietîfs di interès comun cun altris ents locâi, si organize zovantsi dai modui e dai istitûts previodûts de leç cun acuardis e cun intesis di cooperazion.

ART. 47
CONVENZIONI

1) Il Comun al pues promovi la colaborazion, il coordinament di funziuns e di servizis, ancje individuand gnovis ativitâts di comun interès, o ben la esecuzion e la gjestion di oparis publichis, la realizazion di iniziativis e programs speciâi e altris servizis, favorint la stipule di specifichis convenziuns cun altris ents locâi o cun lôr ents strumentâi.

2) Lis convenziuns cun dentri i elements e i oblics previodûts de leç, a son fatis buinis dal consei comunâl cun maiorance assolude dai assegnâts.

ART. 48
CONSORZIS

1) Il Comun, in coerenza cui principis statutaris, al pues promovi la costituzion di un consorzi tra ents par meti in vore e par gjestî servizis rilevants sot dal profîl economic o imprenditoriâl, o ben par economie di scjale tal câs che no convegna la istituzion di une aziende speciâl e nol sedi just zovâsi des formis organizativis pai servizis stes, cemût che al è previodût tal articul parsore.

(1) art. 16 comis di 36 a 41 de L.R. N. 25/1999

2) La convenzion in plui dal contignût prescrit dal secont come dal art. 48 parsore, al à di previodi l'oblic di publicazion dai ats fundamentâi dal consorzi tai cuadris pretoris dai ents che le contrain.

3) Il consei comunâl, dutun cu la convenzion, al fâs bon il Statût dal consorzi che al à di regolâ l'ordenament organizatîf e funzionâl dal gnûf ent daûr des normis previodudis pes aziendis speciâls dai Comuns, in ce che a son compatibii.

4) Il consorzi al cjape caratar polifunzionâl cuant che di bande di chei stes ents locâi, si vûl gjestî une pluralitât di servizis cul modul consortîl.

ART. 49
ACUARDIS DI PROGRAM

1) Pe definizion e pe metude in vore di oparis, interventi o programs di intervent che a domandin, pe lôr complete realizazion, la azion integrate e coordinade dal Comun, de Provincie e de Regjon, di amministrazions statâls e di altris sogjets publics, o in dut câs di doi o plui tra i sogjets za dits, il Sindic, tal câs che la competence primarie o prevalente su la opare o sui interventi o sui programs di intervent i tocji al Comun, al promôf la conclusion di un acuardi di program, ancje daûr de domande di un o plui dai sogjets interessâts, par garantî il coordinament des azions e par determinâ i tîmps, lis modalitâts, il finanziament e ogni altri adempiment leât.

2) Il Sindic al definìs e al stipule l'acuardi, dopo de deliberazion di intindiments dal consei comunâl, cu la osservance di chês altris formalitâts previodudis de leç e rispêtant lis funziuns assegnadis cul Statût.

TITUL CUINT
ORDENAMENT DAI SERVIZIS PUBLICS

CJAPITUL PRIN
ORDENAMENT DAI SERVIZIS PUBLICS

ART. 50
SERVIZIS PUBLICS LOCÂI

1) Il Comun, tes sôs competencis, al viôt de gjestion dai servizis publics che a vedin par ogjet produzion di bens e ativitâts indreçadis a meti in vore fins sociâi e a promovi il disvilup economic e civîl de comunitât locâl.

2) I servizis risiervâts in maniere esclusive al Comun a son fissâts de leç.

3) Il Comun al gjestîs i servizis publics in chestis formis:

- a) in economie, cuant che pes piçulis dimensions o pes carateristichis dal servizi nol sedi just costituî une istituzion o une aziende;
- b) in concession a tierçs, cuant che a sedin resons tecnichis, economichis e di oportunitât sociâl, rispientant il principi di sussidiarietât;
- c) cun aziende speciâl, ancje pe gjestion di plui servizis di rilevanze economiche e imprenditoriâl;
- d) cun istituzion, pal esercizi di servizis sociâi cence rilevanze imprenditoriâl;
- e) cun societât, tal câs che e torni juste, in relazion ae nature dal servizi di erogâ, la partecipazion di altris sogjets publics o privâts.

ART.51
AZIENDIS SPECIÂLS E ISTITUZIONI

1) La aziende speciâl e je ent strumentâl dal Comun indotât di personalitât juridiche, di autonomie imprenditoriâl e di so statût, fat bon dal Consei comunâl.

2) La istituzion e je organisim strumentâl dal Comun pal esercizi di servizis sociâi, indotât di autonomie gjestionâl.

3) Orghins de aziende e de istituzion a son il Consei di aministrazion, il president e il diretôr, che i i tocje la responsabilitât gjestionâl; a son nomenâts dal Sindic, su la fonde dai indreçaments pe nomine, fats bogns dal Consei comunâl.

4) Il President e i singui components a puedin jessi revocâts, daûr di determinazion motivade dal Sindic, che al viôt tal stes contest de lôr sostituzion.

5) La aziende e la istituzion a fondin la lôr ativitât su criteris di eficacitât, eficiencie e economicitât e a àn l'oblic dal pâr di bilanç di cirî di rivâi cul ecuilibri dai coscj e des jentradis, cjapant dentri ancje i trasferiments.

6) Te leç, l'ordenament e il funzionament des aziendis speciâls a son regolâts dal so statût e dai regolaments; chei des istituzions a son regolâts dal statût e dai regolaments dal Comun.

7) Il Comun al da il capitâl di dotazion, al determine lis finalitâts e i indreçaments, al fâs bogns i ats fundamentâi, al esercite la vigilance, al verifiches i risultâts de gjestion, al viôt de cuviertidure dai eventuâi coscj sociâi.

8) Il coleç dai revisôrs dai conts dal Comun al esercite lis sôs funzions ancje pes istituzions. Il statût de aziende speciâl al previôt un orghin di revision specific, e ancje formis autonomis di verifiches de gjestion e formis di control dai utents sul davuelziment dai servizis.

TITUL SEST
PARTECIPAZION POPOLÂR

CJAPITUL PRIN
PARTECIPAZION POPOLÂR

ART. 52
PRINCIPIIS GJENERÂI

- 1) Il Comun al garantîs e al promôf la partecipazion dai citadins ae ativît dal ent, par sigurâ la lôr buine ande, la lôr imparzialitât e la lôr trasparenze.
- 2) Par chei stes fins, il Comun al premie lis formis associativis libaris e lis organizazions di volontariât, judantlis a vê acès aes struturis e ai servizis dal ent.
- 3) Ai citadins, cun di plui, a son permetudis formis diretis e semplificadis di tutele dai interès favorint il lôr intervent te formazion dai ats aministratîfs.
- 4) La aministrazion e pues inviâ formis di consultazion par otignî il parê de popolazion, di sogjets economics e altris su specifics problemis.

CJAPITUL SECONT
INIZIATIVE POLITICHE E AMINISTRATIVE

ART. 53
ISTANCIS

- 1) I citadins, lis associazions, i comitâts e i sogjets coletîfs in gjenar a puedin indreçâ al Sindic interrogazions che cun chei si domandin sclariments su aspiets specifics de ativît de aministrazion.
- 2) La rispueste ae interrogazion e ven furnide dentri dal tiermin di 60 dîs dal Sindic, o dal segretari, o dal dependent responsabil a seconde de nature politiche o gjestionâl dal cantin mot.
- 3) Lis modalitâts de interrogazion a son segnadis dal regolament su la partecipazion, che al à di previodi i timps, la forme scrite o altre buine forme di comunicazion de rispueste, e ancje justis misuris di publicitât de istance.

ART. 54
PETIZIONS

- 1) Ducj i citadins a puedin indreçâsi, di singui o in forme colective, ai orghins de aministrazion par sburtâle a intervignî su cuistions di interès gjenerâl o par pandi dibisugnis comunis.
- 2) Il regolament dal tierç come dal art. 53 al determine la procedure de petizion, i timps, lis formis di publicitât e la assegnazion al orghin competent, che al procêt tal esam e che al pronte lis modalitâts di intervent dal Comun su la cuistion mote o al dispon la archiviazion tal câs che nol pensi di aderî ae indicazion tignude dentri te petizion. In chest ultin câs, il provediment conclusîf dal esam di bande dal orghin competent al à di jessi a palês motivât e publicizât cemût che al covente.
- 3) La petizion e je esaminade dal orghin competent dentri di dîs 30 de presentazion.
- 4) Se il tiermin previodût nol è rispjetât, ogni conseîr al pues movi la cuistion in consei, domandant reson al Sindic dal ritart o tacant une discussion sul contignût de petizion. Il Sindic al scuen in dut câs meti la petizion tal ordin dal dî de prime sentade dal consei.

5) La procedure si siere in ogni câs cuntun provediment pandût, e il sogjet che al propon al à di vê garantide la sô comunicazion.

ART. 55 PROPUESTIS

1) Un numar di 50 citadins eletôrs al pues fâ indevant propuestis par cjapâ ats aministratîfs che il Sindic al trasmet dentri di 30 dîs dopo dal orghin comunâl competent, cun dongje il parê dai responsabii dai servizis interessâts e dal segretari, e ancje de atestazion pe cuviertidure finanziarie.

2) L'orghin competent al à di sintî chei che a proponin la iniziative dentri di 60 dîs de presentazion de propueste.

3) Tra la Aministrazion comunâl e chei che a proponin si pues rivâ a stipulâ acuardis par rivâ al public interès par determinâ il contignût dal provediment finâl che par chel e je stade promovude la iniziative populâr.

CJAPITUL TIERÇ ASSOCIAZIONISIM E PARTECIPAZION

ART. 56 PRINCIPIS GJENERÂI

1) Il Comun al valorize lis autonomis formis associativis e di cooperazion dai citadins cu lis formis di incentivazion previodudis di chest art. 60, cul acès ai dâts che la Aministrazion e à in possès e cjapant buinis formis di consultazion tal procediment di formazion dai ats gjenerâi.

2) I criteris gjenerâi, lis modalitâts di incentivazion e plui in gjenerâl i rapuarts tra chescj organisims e l'ent a saran regolâts di regolament specific.

ART. 57 FORMIS ASSOCIATIVIS

1) Il Comun al favorìs la formazion di organisims di base associative, ancje chei di nature economiche, che a disvilupin e che a gjestissin servizis e struturis che lis lôr finalitâts a sedin la promozion economiche, sociâl e civîl de comunitât.

2) Al ricognòs il rûl fundamentâl, tra lis associazions, de Pro-Loco dal Comun di Remanzâs.

3) In chest cjamp e incentive in maniere particolâr chês formis associativis, e tra chês chês di nature cooperativistiche, che a judin ae gjestion dai servizis comunâi daûr de domande individuâl, des ativitâts scolastichis e formativis, di chês sportivis, culturâls, ricreativis e plui in gjenerâl dai servizis e des struturis economicis cun interès gjenerâl preminent.

4) Il Comun al podarà designâ siei rapresentants tai organisims associatîfs e cooperatîfs rispietant i principis fissâts de leç 142/90.

5) Il Comun al compartecipe ae ativitât e ae Aministrazion dal "Forno Rurale Comunale di Remanzacco" Soc. Coop. a r.l. tes formis e tai limits fissâts de legislazion in vore.

6) Al è garantît aes associazions e ai organisims di volontariât, che a àn riferiment locâl, l'acès aes struturis dal Ent pes finalitâts di interès public.

7) La Zonte comunâl e regjistre, dopo de istance dai interessâts e pai fins dai comis parsore, lis associazions che a lavorin tal teritori.

ART. 58 ORGANISIMS DI PARTECIPAZION

1) Il Comun al promôf e al tutele lis variis formis di partecipazion dai citadins. Dutis lis agregazions a àn i podêrs di iniziative previodûts tai articui parsore.

ART. 59 INCENTIVAZION

1) Aes associazions e ai organisims di partecipazion dal articul 58 chi parsore, a puedin jessi erogadis formis di incentivazion cun apuarts sedi di nature finanziarie e patrimoniâl, che tecniche professionâl e organizzative, daûr dai criteris fissâts in regolament specific.

ART. 60 COMISSIONS COMUNÂLS

1) A puedin jessi costituitis Comissions specifichis cun caratar consultîf o partecipatîf che a saran nomenadis de zonte, dopo sintude la conference dai cjâfs grup. Di chestis comissions a podaran fâ part citadins e rapresentants des associazions e/o di organisims presints tal teritori che a lavorin tal cjamp di interès specific.

2) Par dâ garanziis di dirit e ciertece dal lôr efetîf gjoldiment in particolâr ae popolazion anziane, il Comun al promôf struments di consultazion su la alocazion des risorsis daûr di criteris di prioritât pai interventi sociosanitaris in pro dai anzians, pal volontariât sociâl, pe solidarietât organize, pe eliminazion des barieris che a limitin l'acès dai anzians e dai disabii ai servizis sociâi. Par un tant al calcole fundamentâl, tra i interlocutôrs, lis Organizzazioni Sindacâls, (e in dut câs chês che a sedin ricognossudis plui rappresentativis daûr dai criteris di leç) rappresentativis dai interès dai citadins anzians e pensionâts.

3) E je istituide la Commission comunâl par chês stessis oportunitâts, che e ven nomenade de Zonte comunâl, sintude la Conference dai Cjâfs grup e che il so funzionament e atribuzions a saran definîts di regolament specific.

ART. 61 DIRIT DI ACÊS

1) Ducj i citadins, singui o associâts, a àn dirit di cjapâ vision dai ats e provvedimenti cjapâts dai orghins dal Comun daûr des modalitâts fissadis dal regolament.

2) Par un tant al è istituît li de Sede comunâl l'Ufici relazions pal Public, cu lis competencis previodudis des normis di leç in vore, di chest Statût e dal regolament pal ordenament dai uficis e dai servizis.

ART. 62 PARTECIPAZION AL PROCEDIMENT AMINISTRATÎF

1) Gjavant i câs che la partecipazion al procediment e je regolate de leç e li che no sedin resons di impediment derivadis di particolârs dibisugnis di sveltece, il comun al garantîs, ai

citadins e ai sogjets che il provediment finâl è destinât a produci su di lôr i siei efîets, la partecipazion al provediment aministratîf, cu la comunicazion di inviamet dal procediment e la informazion fisse dal so stât. (1)

2) La rapresentance dai interès di tutelâ si pues fâ par opare sedi dai sogjets singui che di sogjets coletîfs.

ART. 63 REFERENDUM

1) Al è ametût referendum consultîf, abrogatîf e propositîf (2) dome su problemis di interès e rilevance gjenerâl dal Comun.

2) Nol è in dut câs ametût il ricors a referendum in chestis materiis:

- tribûts, tarîfis, contribuzions, balanç e cont;
- plan regoladôr gjenerâl;
- statût comunâl;
- regolament pal funzionament dal Consei comunâl;
- nominis e designazions dal art.32, let. n), de leç n. 142/90;
- contrats di lavôr dai dipendents;
- ativitâts aministrativis vincoladis di leçs statâls e regionâls;
- materiis che a son za stadis ogjet di consultazions referendariis tai cinc agns prime.

3) Il regolament al regole lis modalitâts pe racuelte des firmis, il numar di eletôrs iscrits tes listis elettorâls (ancje dât in valôr percentuâl) che al covente par rindi valide la domande, la amissibilitât dai cuesîts, il numar dai conseîrs che al covente pal bon acet de proposte di clamade dal Referendum, il davuelziment des operazions di vôt, i quorums pe validitât de consultazion, il quorum che al covente pal bon acet dal referendum, la composizion de comission consiliâr specifiche.

4) Su la amissibilitât dai cuesîts e su la convocazion dal referendum che indi derive e decît la comission consiliâr specifiche integrade dal prin firmatari de proposte di referendum.

5) Denti di trê mês de proclamazion dal risultât favorevul dal referendum, la Zonte comunâl e à di proponi al Consei comunâl un provediment che al à par ogjet il cuesît sometût a referendum.

ART. 64 DIRIT AE RISERVATECE

1) Il Comun di Remanzâs al juste la organizazion e i procediments aministratîfs al rispiet dai dirits e des libertât fundamentâls, e ancje ae dignitât des personis fisichis, cun riferiment particulâr ae riservatece e ae identitât personâl; al garantîs cun di plui i dirits des personis juridichis e di ogni altri ent e associazion. (3)

(1) art. 3 de leç 03.08.1999, n. 265

(2) art. 3 de leç 03.08.1999, n. 265

art. 1 leç n. 675/1996

CJAPITUL CUART DIFENSÔR CIVIC

ART. 65 ISTITUZION E ATRIBUZIONI

1) Di garanzie de imparzialitât e dal bon procedi de ativitât aministrative comunâl al pues jessi istituît l'ufici dal difensôr civic.

ART. 66
NOMINE

1) Il Difensôr Civic al è nomenât dal Consei comunâl cun scrutini segret e cun maiorance assolude dai conseîrs assegnâts al Comun;

2) Al reste in carche cu la stesse durade dal Consei che lu à elet fasint lis sôs funzions fintremai al insediament dal sucessôr.

3) Il Difensôr Civic al è sielt tra personis che a àn esperience e competence particulâr in materie juridiche aministrative e che a ufrissin garanzie di indipendence, obietivitât e serenitât di judizi.

4) L'Ufici dal Difensôr Civic nol pues jessi esercitât di chei che a davuelzin une funzion politiche o di istitût dentri tai Ents Statâi, Regjonâi, Provinciâi e Comunâi o che in dut câs a fasin une ativitât in cualchi mût vincolade e colegade ai Ents a pene dits.

5) Il Difensôr, prime dal so insediament, al fâs zurament tes mans dal Sindic cun cheste formule:

" giuro di osservare lealmente le leggi dello Stato e di adempiere le mie funzioni al solo scopo del pubblico bene ".

6) Il Difensôr Civic al pues jessi revocât par:

- a) pierdite di carateristichis domandadis;
- b) risultâ di cause di incompatibilitât;
- c) par ineficiencie comprovade.

Al è revocât dal Consei Comunâl a maiorance assolude dai assegnâts.

TITUL SETIM
ORDENAMENT FINANZIARI

CJAPITUL PRIN
FINANCE E CONTABILITÂT

ART. 67
FINANCE LOCÂL

1) Il Comun al à autonomie finanziarie fondade su ciertecis di risorsis sôs e trasferidis, te suaze des leçs su la finance publiche.

2) Il Comun al à, cun di plui, potestât impositive autonome tal cjamp des impuestis, des tassis e des tarifis tai limits fissâts de leç.

3) Lis jentradis fiscâls a finanziin i servizis publics che si pense che a coventin pal disvilup de comunitât e a integrin la contribuzion erariâl pe erogazion dai servizis publics indispensabii.

4) Al Comun i tocjin lis tassis, i dirits, lis tarifis e i corispetûfs sui servizis di lôr competence.

5) Il Stât e lis Regions, tal câs che a previodin par leç câs di gratuitât tai servizis di competence dal Comun, o ben che a fassin presits o tarifis parsot dal cost efetîf de prestazion, a àn di garantî al Comun risorsis finanziariis compensativis.

ART. 68
ORDENAMENT CONTABIL

1) L'ordenament contabil dal Comun e la amministrazion dal patrimoni a son regolâts di regolament di contabilitât specific, che al regole lis specifichis competencis dai sogjets preponûts ae programazion, adozion e metude in vore dai provvedimenti di gjestion cun caratar finanziari e contabil, lis modalitâts di espression dai parês contabii, lis segnalazions obligatoriis, la istituzion dal servizi di economât.

TITUL OTÂF
I REGOLAMENTS

CJAPITUL PRIN
REGOLAMENTS

ART. 69
PROCEDIMENTS PE FORMAZION DAI REGOLAMENTS

- 1) La iniziative pe adozion di regolaments e je risiervade ae Zonte municipâl e ai conseîrs.
- 2) Ae formulazion dai regolaments a puedin jessi clamâts a partecipâ associazions e citadins; la lôr redazion e pues vignê daûr di consultazions.

TITUL NONESIM
REVISION DAL STATÛT

CJAPITUL PRIN
REVISION DAL STATÛT

ART. 70
MODALITÂTS

- 1) Lis deliberazions di revision dal statût a son fatis buinis dal Consei comunâl cu lis modalitâts dal art. 4, come 3, de leç 8.6.1990, n. 142.
- 2) Ogni iniziative di revision statutarie, parade indaûr dal Consei comunâl, no pues jessi rinovade, se no dopo che al sedi passât un an de deliberazion di refudament, a fasin ecezion lis modificazions obligatoriis par leç.
- 3) La deliberazion di abrogazion totâl dal statût no à nissun efiet se no à dongje la deliberazion di un gnûf statût, che al cjapi il puest di chel di prime, e al tache a jessi valit dal dì di jentrade in vore dal gnûf statût.

TITUL DECIM

NORMIS TRANSITORIIS E FINÂLS

CJAPITUL PRIN NORMIS TRANSITORIIS E FINÂLS

ART. 71 REGOLAMENTS

1) Fin che no si cjapi gnûfs regolaments a restin in vore, tes parts che no van cuintri des leçs dal Stât, de Region e di chest statût, lis normis cjapadis dal Comun daûr de prime legjislazion.

ART. 72 JENTRADE IN VORE

1) Chest statût, dopo che al è stât fat il control di bande dal orghin regionâl competent, al è publicât tal Boletin uficiâl de Region e picjât tal cuadri pretori comunâl par trente dîs seguitîfs.

2) Il Sindic al mande il Statût, cu la certificazion de publicazion dal prime come, al Ministeri dal Interni par che al sedi metût dentri te racuelte uficiâl dai statûts.

3) Chest statût al jentre in vore dopo che a sedin passâts trente dîs di cuant che al è stât picjât tal cuadri pretori (1)

4) Il segretari dal Comun al met in bande dal originâl dal statût la declarazion de jentrade in vore.

(1) art. 1 come 3 de leç 03.08.1999, n. 265